

НЕДЕЛЯ СЕДЬМАЯ ПО ПАСЦЕ.

НЕДЕЛЯ, СВЯТЫХ, БОГОНОСНЫХ ОТЕЦ, ИЖЕ В НИКЕИ

В СУББОТУ ВЕЧЕРА НА МАЛЕЙ ВЕЧЕРНИ

На Господи воззвах: поставим стихи 4.

И поем стихиры воскресны, глас 6-й:

Победу имей Христе, юже на ада, на Крест возшел еси: да во тме смерти сядящия воскресиши с Собою, Иже в мертвых Свободь, Источай живот от Своего света, Всесильне Спасе, помилуй нас. [Дважды]

Днесь Христос смерть поправ, якоже рече, воскресе, и радование миру дарова, да вси вызывающе, песнь тако рцем: Источниче жизни, Непреступный Свете, Всесильне Спасе, помилуй нас.

Тебе Господи Сущаго по всей твари, грешнии камо бежим? На небеси Сам живещи, во аде поправ еси смерть. Во глубины морския? Тамо рука Твоя Владыко. К тебе прибегаем, Тебе припадающе молимся: Воскресый из мертвых, помилуй нас.

Слава: глас тойже:

Тайныя днесь Духа трубы, богоносныя отцы восхвалим песнопевщия посреде Церкви песнь сличную богословия, Троицу Едину непремennую, Существо же и Божество, низложители Ариевы, и православных поборники, молящияся всегда Господу, помиловатися душам нашим.

И ныне: Богородичен:

Достойно есть яко воистинну, блажити Тя Богородицу: в Твое бо пречистое вшед чрево всех Содетель, плоть бысть, не преложився естеством, ниже мечтався о смотреии: но восприетей из Тебе словесно одушевленной плоти соединився, по ипостаси. Отонудуже благочестно во обоих естествах являющихся разнство творим. Того моли Честная Пресвятая, низпослати нам мир и велию милость.

На стиховне, воскресная стихира. глас 6-й:

Воскресение Твое Христе Спасе, ангели поют на небесех, и нас на земли сподоби чистым сердцем Тя славить.

Таже, настоящия стихиры Пресвятыя Богородицы, глас 6-й:

Подобен: Всю отложивше:

Стих: Помяну имя Твое во всяком роде и роде:

Клятвою яко обеща Твоему праотцу древле Бог Прелетный, в последняя времена соверши, произшед Пречистая от чрева Твоего божественнаго. Ибо воистинну возсия от Тебе Господь, дланию содержай концы: егоже и мне

благоуветлива сотвори в час судный Дево Блаженная, Того Царствия мя получитьи добродетелей возвышением, и страстей умерщвлением.

Стих: Слыши Дщи и виждь, и приклони ухо Твое:

Ума чистотою Исаия Дево издалеча прорече, родити имущую Создателя всея твари Тя, Честная Пречистая: Ты бо явилася еси едина во веки Всенепорочная. Темже Тя молю: оскверненую очисти душу мою, и светлости божественныя общника мя покажи, и Божественнаго Твоего Сына стояния деснаго, егда сядет, якоже писано есть, судити миру всему.

Стих: Лицу Твоему помолятся богатии людстии.

Смерти разрушение Рождеством Твоим явися, Ты бо Отроковице Живота Нетленнаго пребывалище. Темже Тя молю, в местех адовых страстей моих лежаща Ты возстави, и к веселию мя оживи Дево. Руководствуй ко блаженному возданию, и вечныя и божественныя сподоби радости, идеже сладость присносущная, идеже свет невечерний.

Слава: глас 4-й:

Молебную память днесь богоносных отцев, от всея вселенныя собравшихся, в светлем граде Никейстем, православных собрания, благочестующе верно празднуим. Сии бо лютаго Ариа безбожное веление благочестномудренне низложиша, и от Кафолическия Церкви соборне того изгнаша: и ясно Сына Божия единосущна и соприсносущна, прежде век Суща, всех научиша исповедати во изображении веры, известно и благочестно сие изложивше. Темже и мы божественным их повелением последствующе, известно верующе служим, со Отцем Сыну, и Духу Всесвятому, во едином Божестве, Троице Единосущней.

И ныне: праздника, глас 4-й:

Господи, таинство еже от веков сокровенное и от родов исполнив яко Благ, пришел еси со ученики Твоими на гору Елеонскую, имеяй Рождшую Тя Творца, и всех Содетеля: Той бо в страсти Твоей матерски паче всех болезновавшей, подобаше и славою плоти Твоя премногия насладитися радости. Еяже и мы причащающесе, еже на небеса восходом Твоим Владыко, великую Твою милость на нас бывшую славим.

Тропарь воскресн, глас 6-й:

Ангельския силы на гробе Твоем, и стрегущии омертвеша: и стояше Мариа во гробе, ищущи Пречистаго Тела Твоего. Пленил еси ад, не искусився от него: сретил еси Деву, даруяй живот, воскресый из мертвых, Господи слава тебе.

Слава, и ныне: тропарь Вознесения глас 4-й:

Вознеслся еси во славе Христе Боже наш, радость сотворивый учеником, обетованием Святаго Духа, извещенным им бывшим благословением: яко Ты еси Сын Божий Избавитель мира.

Ектении, и отпуст.

НЕДЕЛЯ СЕДЬМАЯ ПО ПАСЦЕ.

НА ВЕЛИЦЕЙ ВЕЧЕРНИ

Блажен муж: На Господи возвах: поставим стихов 10, и поем воскресны 3: и Вознесению 3: и отцем 4.

Стихиры воскресны, глас 6-й:

Победу имеяй Христе, юже на ада, на Крест возшел еси: да во тме смерти сидящия воскресиши с Собою, Иже в мертвых Свободь, Источай живот от Своего света, Всесильне Спасе, помилуй нас.

Днесь Христос смерть поправ, якоже рече, воскресе, и радование мирови дарова, да вси взывающе, песнь тако рцем: Источниче жизни, Неприступный Свете, Всесильне Спасе, помилуй нас.

Тебе Господи Суцего по всей твари, грешнии камо бежим? На небеси Сам живещи, во аде попрал еси смерть. Во глубины морския? Тамо рука Твоя Владыко. К тебе прибегаем, Тебе припадающе молимся: Воскресый из мертвых, помилуй нас.

Ины самогласны, Вознесения, глас тойже:

Господь Вознесся на небеса, да послет Утешителя миру, небеса уготоваша престол Его, облацы восхождение Его: ангели дивятся, Человека зряще превыше себе. Отец ждет, Егоже в недрах иматъ Соприсносущна, Дух же Святый велит всем ангелом Его: возьмите врата князи ваши. вси языцы восплещите руками, яко взыде Христос, идеже бе первее.

Господи, Твоему Вознесению удивившася херувими, зряще Тебе Бога на облацех восходяща, на них сидящаго, и славим Тя, яко блага милость Твоя: слава Тебе.

На горах святых зряще Твое Вознесение Христе, Сияние славы Отчи, воспоем Твой светообразный лица зрак, кланяемся Страстем Твоим, почитаем Воскресение, славное Вознесение славяще, помилуй нас.

Ины стихиры святым отцем. Глас 6-й:

Подобен: Отчаянная:

Из чрева родился еси прежде денницы, от Отца безматерен прежде век: аще и Арий тварь Тя, а не Бога славит, дерзостию смешая Тя Зиждителя тварем безумно, вещество огня вечнаго себе сокровиществуяй. Но Собор иже в Никеи, Сына Божия Тя проповеда Господи, Отцу и Духу Сопрестольна.

Кто Твою Спасе ризу раздра? Арий, Ты рекл еси, иже Троицы пресече Единочестное Начало в разделения: сей отверже Тя быти Единаго от Троицы, сей и Нестория учит Богородицу не глаголати. Но Собор, иже в Никеи, Сына Божия Тя проповеда Господи, Отцу и Духу Сопрестольна.

В брег падает греха Арий, возненавидевый света видети, и божественною растерзается удищею внутренних, все издати существо и душу нужно, другой Иуда быв нравом и образом. Но Собор, иже в Никеи, Сына Божия Тя проповеда Господи, Отцу и Духу Сопрестольна.

Арий безумный Пресвятая Троицы пресече единачалие, в три беззаконная же и несрасленная существа. Темже отцы богоноснии сопедшеся усердно, ревностию разжизаеми, якоже Фесвитянин Илия, духовным посекают мечем стыду научившаго хульника, якоже Дух вещаше.

Слава: глас 6-й:

Тайная днесь Духа трубы, богоносная отцы восхвалим песнопевшая посреде Церкви песнь сличную богословия, Троицу Единую непременною, Существо же и Божество, низложители Ариевы, и православных поборники, молящиеся всегда Господу, помиловатися душам нашим.

И ныне: Богородичен:

Кто Тебе не ублажит, Пресвятая Дево? Кто ли не воспоет Твоего Пречистаго Рождества? Безлетно бо от Отца возсиявый Сын Единородный, Тойже от Тебе Чистая пройде, неизреченно воплощся, естеством Бог Сый, и естеством быв Человек нас ради, не во двою лицу разделяемый, но во двою естеству неслитно познаваемый. Того моли Чистая Всеблаженная, помиловатися душам нашим.

Вход. Прокимен дне, и чтения.

Бытия чтение. [Глава 14.]

Слышав Аврам, яко пленен бысть Лот братаничъ его, сочте своя домочадцы триста и осмьнадесять, и погна в след их даже до Дана, и нападе на ня нощию сам, и отроцы его с ним: и порази их, и гони их до Ховала, еже есть опшуюю Дамаска. И возврати всякаго коня содомскаго, и Лота братанича своего возврати, и вся имения его, и жены и люди. Изыде же царь Содомский во сретение ему, повнегда возвратитися ему от сеча Ходоллогоморскаго, и с царьми иже с ним, во юдоль Савин: сие же бяше поле царево. И Мелхиседек царь Салимский изнесе хлеба и вино, бяше же священник Бога Вышняго. И благослови Аврама, и рече: благословен Аврам Богом Вышним, Иже созда небо и землю, и благословен Бог Вышний, Иже предаде враги твоя под руки тебе.

Второго закона чтение. [Глава 1.]

Во днех оных, рече Моисей к сыном Израилевым: видите, предах пред лицом вашим землю: вшедше наследуйте землю, еюже клятся Господь отцем вашим, Аврааму, Исааку и Иакову, дати им, и семени их по ним. И рекох к вам во время оно, глаголя: не возмогу един водити вас, Господь Бог наш умножил вы есть, и се есте днесь яко звезды небесныя множеством. Господь Бог отец наших да приложит вам, яко да будете тысящами сугубо, и да благословит вас,

якоже глагола вам. И взях от вас мужы мудры, и сведомы, и смыслены, и поставих их владети над вами тысящначальники, и стонащальники, и пятьдесятначальники, и десятоначальники, и писмовводители судиям вашим. И заповедах судиям вашим во время оно, глаголя: разслушайте посреде братий ваших, и судите праведно посреде мужа, и посреде брата его, и посреде пришельца его, да не познаете лица в суде. малому и великому судиши, и не устыдишися лица человеческа, яко суд Божий есть.

Второго закона чтение. [Глава 10.]

Во днех оных, рече Моисей к сыном Израилевым: се Господа Бога твоего небо, и небо небесе: земля, и вся елика суть на ней. Обаче отцы ваши произволи Господь любити я: и избра семя их по ним, вас, паче всех язык, в день сей. И обрежьте жестосердие ваше, и выи ваша не ожесточите ктому. Ибо Господь Бог наш, Сей Бог богов, и Господь господей: Бог Великий, Крепкий и Страшный, Иже не дивится лицу, ниже возьмет дар. Творяй суд пришельцу, и сироте и вдове, и любит пришельца, дати ему хлеб и ризу. И возлюбите пришельца: пришельцы бо бесте в земли египетстей. Господа Бога твоего да убоишися, и Тому единому послужиши, и к Нему прилепишися, и именем его кленешися. Той хвала твоя, и Той Бог твой, Иже сотвори тебе великая и славная сия, яже видесте очи твои.

На литии стихира праздника, глас 1-й:

Возпел на небеса, отонудуже и сошел еси, не остави нас сирых Господи: да придет Твой Дух, нося мир миру, покажи сыном человеческим дела силы Твоя, Господи Человеколюбче.

Слава: отцем, глас 3-й:

Апостольских преданий известнии хранителие бысте святии отцы: Святые бо Троицы Единосущное православно научивше, Ариево хуление соборне низложили, с ним же и Македония духоборца обличивше, осудили Нестора, Евтихия и Диоскора, Савеллия же и Севира безглавного: Ихже прелести испросите избавитися нам, нескверну нашему житию в вере сохранитися, молимся.

И ныне: празднику, глас 6-й:

Господи, смотрения совершив таинство, поим Твоя ученики на гору Елеонскую возносился еси, и се твердь небесную прошел еси, мене ради Обнищавый по мне: и возпел отонудуже не разлучился еси, Всесвятаго Твоего Духа низпосли просвещающа души наша.

На стиховне стихира, глас 6-й:

Воскресение Твое Христе Спасе, ангели поют на небесех, и нас на земли сподоби чистым сердцем Тя славить.

Ины стихиры по алфавиту.

Стих: Господь воцарися, в лепоту облечеся.

Врата сокрушив медная, и верей адовы сотрый, яко Бог Всесилен, род человеческий падший воскресил еси. Сего ради и мы согласно вопием: воскресый из мертвых, Господи слава Тебе.

Стих: Ибо утверди вселенную, яже не подвижится.

Тления нас древняго Христос исправить хотя, на Кресте пригвождается, и во гробе полагается, Егоже мирносицы жены со слезами искаху, рыдающе глаголаху: увы нам Спасе всех, како изволил еси во гроб вселиться? Вселивый же ся хотяй, како украден был еси? Како преложен был еси? Кое же место Твое Живоносное сокры Тело? Но Владыко, якоже обещался еси, нам явился, и утоли от нас рыдание слез. Плачущимся же им, ангел к ним возопи: от плача преставшие, апостолом рцыте, яко воскресе Господь, мирови даруяй очищение и велию милость.

Стих: Дому Твоему подобает святины Господи, в долготу дний.

Распныйся яко восхотел еси Христе, и смерть погребением Твоим пленивый, тридневен воскресл еси яко Бог со славою, мирови даруяй безконечную жизнь, и велию милость.

Слава: отцем, глас 4-й:

Молебную память днесь богоносных отцев, от всея вселенныя собравшихся, в светлом граде Никейстем, православных собрания, благочестующе верно празднуим. Сии бо лютаго Ариа безбожное веление благочестномудренне низложиша, и от Кафолическия Церкви соборне того изгнаша: и ясно Сына Божия единосущна и соприисносущна, прежде век Суща, всех научиша исповедати во изобразении веры, известно и благочестно сие изложивше. Темже и мы божественным их повелением последствующе, известно верующе служим, со Отцем Сыну, и Духу Всесвятому, во едином Божестве, Троице Единосущней.

И ныне: празднику, глас тойже.

Господи, таинство еже от веков сокровенное и от родов исполнив яко Благ, пришел еси со ученики Твоими на гору Елеонскую, имеяй Рождшую Тя Творца, и всех Содетеля: Той бо в страсти Твоей матерски паче всех болезновавшей, подобаше и славою плоти Твоя премногия насладитися радости. Еяже и мы причащающеся, еже на небеса восходом Твоим Владыко, великую Твою милость на нас бывшую славим.

Таже, Ныне отпуцаеши: Трисвятое, и по Отче наш:

Тропарь отцев, глас 8-й:

Препрославлен еси Христе Боже наш, светила на земли отцы наши основавый, и теми ко истинней вере вся ны наставивый: Многоблагоутробне, слава Тебе. [Дважды]

И праздника единожды, глас 4-й:

Вознеслся еси во славе Христе Боже наш, радость сотворивый учеником, обетованием Святаго Духа, извещенным им бывшим благословением: яко Ты еси Сын Божий Избавитель мира.

И благословение хлебов, и чтение деяний святых апостол.

Аще ли несть бдения, тропарь воскресен: Ангельския силы: Слава: отцев: И ныне: Вознесения. На повечерии кондак отцев: Слава, и ныне: Вознесения. На полунощнице поем канон троичный октоиха гласа, и прочее яко обычно. И отпуст.

НЕДЕЛЯ СЕДЬМАЯ ПО ПАСЦЕ.

В НЕДЕЛЮ НА УТРЕНИ

На Бог Господь: тропарь воскресен, глас 6-й:

Ангельския силы на гробе Твоем, и стрегущии омертвеша: и стояше Мариа во гробе, ищущи Пречистаго Тела Твоего. Пленил еси ад, не искусився от него: сретил еси Деву, даруяй живот, воскресый из мертвых, Господи слава тебе. [Дважды.]

Слава: отцев, глас 8-й:

Препрославлен еси Христе Боже наш, светила на земли отцы наши основавый, и теми ко истинней вере вся ны наставивый: Многоблагоутробне, слава Тебе.

И ныне: тропарь Вознесения, глас 4-й:

Вознеслся еси во славе Христе Боже наш, радость сотворивый учеником, обетованием Святаго Духа, извещенным им бывшим благословением: яко Ты еси Сын Божий Избавитель мира.

По 1-м стихословии, седален, глас 6-й:

Гробу отверсту, аду плачущуся, Мариа вопияше ко скрывшимся апостолом: изыдите винограда делателие, проповедите воскресения слово: воскрес Господь, подай миру велию милость.

Стих: Воскресни Господи Боже мой, да вознесется рука Твоя * не забуди убогих Твоих до конца.

Господи, предстояше гробу Твоему Мариа Магдалина, и плакаше вопиющи, вертоградаря Тя мянщи, глаголаше: где положил еси Вечный Живот? где скрыл еси Сядящаго на престоле херувимстем? Стрегущии бо Сего страха омертвеша. Или Господа моего дадите ми, или со мною возопийте: в мертвых быв, и мертвыя воскресивый, слава Тебе.

Слава, и ныне: Богородичен.

Благословенную Нарекий Твою Матерь, пришел еси на Страсть вольным хотением, возсияв на Кресте, взыскати хотя Адама, глаголя ангелом: срадуйтесь Мне, яко обретется погибшая драхма. Вся мудре устроивый Боже наш, слава Тебе.

По 2-м стихословии, седален, глас 6-й:

Живот во гробе возлежал, и печать на камени надлежал, яко Царя спяща воины стражаху Христа, и враги Своя невидимо поразивый, воскрес Господь.

Стих: Исповемся Тебе Господи всем сердцем моим, * поведем вся чудеса Твоя.

Вольною смертию живот бессмертный обретохом, Всесильне и едины всех Спасе: Ты бо в честном Твоем Восстании вся воззвал еси, разрушивый адову победу и смерти жало.

Слава, и ныне: Богородичен:

Богородице Дево, моли Сына Твоего, волею пригвоздившагося на Кресте, и воскресшаго из мертвых Христа Бога нашего, спастися душам нашим.

По непорочнах, Благословен еси Господи: Ангельский собор:

И абие ипакои, глас 6-й:

Вольною и животворящею Твоею смертию Христе, врата адова сокрушив яко Бог, отверзл еси нам древний рай, и воскрес из мертвых, избавил еси от ислечения живот наш.

Степенна, глас 6-й:

Антифон 1:

На небо очи мои возвожу к Тебе, Слово: ущедри мя, да живу Тебе.

Помилуй нас уничиженных, устрояя благопотребныя Твоя сосуды, Слово.

Слава, и ныне: Святому Духу, всякая всеспасительная вина, аще коему Сей по достоянию дхнет, скоро возьмет от земных, восперяет, возвращает, устрояет горе.

Антифон 2:

Аще не Господь бы был в нас, никтоже от нас противу возмогл бы вражиим бранем одолети: побеждающии бо от зде возносятся.

Зубы их да не ята будет душа моя, яко птенец Слово: увы мне, како имам от врага избыти грехолюбив сый?

Слава, и ныне: Святым Духом обожение всем, благоволение, разум, мир и благословение: равнодетельный бо есть Отцу и Слову.

Антифон 3:

Надеющиеся на Господа врагом страшни, и всем дивни: горе бо зрят.

В беззакония рук своих, праведных жребий, помощника Тя имея Спасе, не простирает.

Слава, и ныне: Святого Духа держава на всех: Ему же вышняя воинства поклоняются со всяким дыханием дольным.

Прокимен, глас 6-й: Господи, воздвигни силу Твою, и прииди во еже спасти нас.

Стих: Пасый Израиля вонми, наставляяй яко овча Иосифа. Всякое дыхание:

Евангелие воскресно от Иоанна, зачало 66:

Во время оно, явися Иисус учеником Своим, востав от мертвых, на мори Тивериадстем. Явися же сице: бяху вкупе Симон Петр, и Фома нарицаемый Близнец, и Нафанаил, иже бе от Каны Галилейския, и сына Зеведеова, и ина от ученик Его два. Глагола им Симон Петр: иду рыбы ловити. Глаголаша ему: идем и мы с тобою. Изыдоша же и вседоша абие в корабль, и в ту ночь не яша ничесоже. Утру же бывшу, ста Иисус при бреже, не познаша же ученицы, яко Иисус есть. Глагола же им Иисус: дети, еда что снадно имате? Отвещаша Ему: ни. Он же рече им: вверзите мрежу о десную страну корабля и обрящете. Ввергоша же и ктому не можаху привлещи ея от множества рыб. Глагола же ученик той, егоже любляше Иисус, Петрови: Господь есть. Симон же Петр слышав, яко Господь есть, епендитом препоясая, бе бо наг, и ввержесе в море, а друзии ученицы кораблем приидоша, не беша бо далече от земли, но яко две сте лактей, влекуще мрежу рыб. Егда убо излезоша на землю, видеша огонь лежащ и рыбу на нем лежащу и хлеб. И глагола им Иисус: принесите от рыб, яже ясте ныне. Влез же Симон Петр, извлече мрежу на землю, полную великих рыб сто и пятьдесят и три, и толико сущым, не проторжесе мрежа. Глагола им Иисус: приидите, пообеуйте. Ни един же смеяше от ученик истязати Его: Ты кто еси? Ведяще, яко Господь есть. Прииде же Иисус, и прият хлеб и даде им, и рыбу такожде. Се уже третие явися Иисус учеником Своим, востав от мертвых.

Таже, Воскресение Христово: Псалом 50: И прочее, обычно.

Канон воскресен, со ирмосом на 4: и Вознесения на 4: и святых отец на 6.

Канон воскресен, глас 6-й:

Песнь 1.

Ирмос: Яко по суху пешешествовав Израиль, * по бездне стопами, * гонителя фараона * видя потопляема, * Богу победную песнь * поим, вопияше.

Распростертыма дланьма на Кресте, Отческаго исполнил еси благоволения Благий Иисусе, всяческая: темже победную песнь Тебе вси поем.

Страхом к Тебе яко рабыня, смерть повелевшися приступи Владыце живота, тою подававшему нам безконечный живот и воскресение.

Богородичен: Своего приимши Содетеля, яко Сам восхоте, из безсеменна чрева Твоего, паче ума воплощаема Чистая, тварей воистинну явилася еси Владычица.

Канон Вознесению, глас 5-й:

Ирмос: Спасителю Богу ...,

Воспоим вси людие, на рамах херувимских Вознесшуся со славою Христу, и спосадившему нас одесную Отца, песнь победную: яко прославися.

Ходатая Богу и человеком Христа, лица ангельстии видевше, с плотию в вышних, удивляхуся, согласно же воспеваху песнь победную: яко прославися.

Явльшемуся Богу на горе Синайстей и закон давшему боговидцу Моисею, от горы Елеонския Вознесшемуся плотию, Тому вси воспоем: яко прославися.

Богородичен: Пречистая Мати Божия, Воплощенного от Тебе, и от недр Родителя не отступльшаго Бога, непрестанно моли, от всякаго обстояния спасти, яже созда.

Канон святым отцем, глас 6-й. егоже краестрочие:

Первое воспою сословие пастырей.

Ирмос: Яко по суху пешешествовав Израиль ...,

Святых отец восхваляя всесвятый Собор, всесвятое того во мне прорицание, вопия: молю Тя Христе, сохранитися мне. [Дважды.]

Богоноснии отцы, яко молния сошедшеся днесь, Тебе Христе Единородна, Отцу Собоизначальна Сына исповедаша ясно, и единосущна.

Слава: Невесты Твоя Церкви, благославнии невестокрасителие Владыко, веры яве определение изложивше златое, яко утварию боголепною сию украсиша.

И ныне: Богородичен: Преукрашенна славою божественною Честная Царица, Сыну Своему и Богу предстоит, нам спасение душевное просящи.

Катавасия: Божественным покровен * медленоязычный мраком, * извитийствова богописанный закон: * тину бо отряс очесе умнаго, * видит Суцгаго, * и научается Духа разуму, * хваля Божественными песньми.

Песнь 3.

Ирмос: Нестъ свят якоже Ты * Господи Боже мой, * Вознесый рог верных Твоих Блаже, * и утвердивый нас на камени * исповедания Твоего.

Бога распинаема плотию зрящи тварь распадешся страхом: но содержащую дланию нас ради Распятаго, крепко содержишися.

Смертию смерть разорившись, лежит окаянная бездыханна: Живота бо не терпящи Божественнаго приложения, мертва бывает крепкая, и даруется всем воскресение.

Богородичен: Божественнаго Рождества Твоего Чистая, всякий естества чин превосходит чудо: Бога бо преестественно зачала еси во чреве, и родши пребываеши присно Дева.

Ин. Вознесению

Ирмос: Силою Креста Твоего Христе ...,

Возшел еси Жизнодавче Христе ко Отцу, и Вознесл еси род наш Человеколюбче, неизреченным благоутробием Твоим.

Чини ангельстии Спасе, человеческое естество видевши совосходящее Тебе, непрестанно удивляеми воспеваху Тя.

Ужасохся ангельстии лица Христе, зряще Тя с телесем Вознесшася, и воспеваху святое Твое Вознесение.

Богородичен: Моли непрестанно чистая, произшедшаго от боку твоею, избавитися прелести диаволи, поющим тя мать Божию.

Ин. святым отцем

Ирмос: Несть свят, якоже Ты Господи ...,

Ток и страсть и сечение, Арий безумный рождеству Божественному злочестно нечестивый прилагая, сечительным отеческим мечем отсекается. [Дважды.]

Якоже древле божественный Авраам, ввоинившеся вси всечестнии богоглаголивии, враги Твоя Блаже неистовныя Твоею силою крепко погубиша. [Дважды.]

Слава: Первое собрание собравшееся Твоих священных, Единосущна Тя Спасе Безначальному Отцу, и Творца всех Рождшагося благочестно проповедаша.

И ныне: **Богородичен:** Не может слово земных, ниже язык Дево восхвалити Тя достойно: из Тебе бо без семени Жизнодавец Христос воплотитися Пречистая благоволи.

Катавасия: Разверзе утробы нечадствовавшия узы, * досаду же неудоботерпиму благочадствующия, * едина молитва пророчицы древле Анны, * носящия дух сокрушен, * к сильному и Богу разумов.

Кондак Вознесению, глас 6-й:

Еже о нас исполнив смотрение, и яже на земли соединив Небесным, Вознесся еси во славе Христе Боже наш, никакоже отлучаяся, но пребывая неотступный, и вопия любящим Тя: Аз есмь с вами, и никтоже на вы.

Икос: **Я**же земли на земли оставившии, яже пепельная персти уступающии, приидите воспрянем, и на высоту возведем очи и мысли, вперим виды, вкупе чувства, на небесная врата смертнии, непщуйм быти в Масличной горе, и взирати на Избавляющаго на облацех носима. Отонуду бо Господь на небеса

востече, и тамо даролюбезны дары раздая апостолом Своим, утепив я яко Отец, и утвердив я, наставив яко сынов, и рече к ним: не разлучаюся вас, Аз есмь с вами, и никтоже на вы.

Таже, седален отцем. Глас 4-й:

Подобен: Скоро предвари:

Светильницы пресветлии истины Христовы миру явистеся на земли воистинну блаженнейшии отцы боговещаннии, изсушивше ереси хульных языковредий, и угасивше пламеновидная злославных смущения: темже яко святителие Христовы, молитесь спастися нам.

Слава: другий, глас тойже.

Подобен: Вознесыйся:

Никейский светлый град днесь, от всея земли к себе призва триста и осмьнадесять священноначальников, на глаголавшаго хулу Ариа, и умаляющего Единого от Троицы, Сына и Слова сущаго Божия, егоже Ариа низложше, веру утвердиша.

И ныне: Вознесения. глас и подобен: тойже.

Возпед на небеса со славою, и соседый Отцу одесную, никакоже разлучился еси Человеколюбче Христе: Духа же Святаго премудрым учеником Твоим послати обещавай, и наша озаривый мысли, даждь просвещение, яко да непрестанно поем Тя, Владыко.

Песнь 4.

Ирмос: Христос моя сила, Бог и Господь, * честная Церковь * боголепно поет взывающи, * от смысла чиста о Господе празднующи.

Древо процвете Христе истинныя жизни: Крест бо водрузися, и напоився кровию и водою от нетленных Твоих ребр, живот нам прозябе.

Не ктому мне змий ложно обожение подлагает: Христос бо Богодетель человека естества, ныне невозбранно стезю мне жизни устрои.

Богородичен: Яко воистинну неизглаголанна и непостижна суть, Твоего Богородице боголепнаго Рождества, сущым на земли и на небеси, Приснодево таинства.

Ин. Вознесению

Ирмос: Услышах слух силы Креста ...,

Вознеслся еси во славе, ангелов Царю, Утешителя нам от Отца послав. Темже вопием: слава Христе, Вознесению Твоему.

Яко възде Спас ко Отцу с плотию, удивившася ангельская воинства, и возопиша: слава Христе Вознесению Твоему.

Горния силы горнейшим вопияху: врата возмите Христу нашему Царю, Егоже воспеваем вкупе со Отцем и Духом.

Богородичен: Дева роди, и матерних не позна, но Мати убо есть, Девою же пребысть: Юже воспевающе, радуйся Богородице, взываем.

Ин. святым отцем

Ирмос: Христос моя сила ...,

Прелюбодействовавый Арий умом неразумным православную веру, отеческими суды изгнан бысть от церкви, якоже уд гнилый, злоименитый. [Дважды.]

О Тебе Владыко, подвизався лик отец, Твоя враги зело победи и Соестественна Тя Отцу и Духу прослави.

Слава: Ходатай был еси Боже и Человеке, Богу и человеком Христе: темже во двою Тя естеству Единого знающе Сына, богомудрии проповедаша.

И ныне: Богородичен: **М**ертва мя показа сада вкушение, Жизнь же Древо из Тебе явльшееся Всечистая воскреси, и райския сладости наследника мя показа.

Катавасия: Царю царей, * яковый от яковаго един Слове произшедый * от Отца безвиновнаго, * равномоцнаго Твоего Духа * апостолом истинно послал еси, * яко Благодетеля поющим: * слава державе Твоей Господи

Песнь 5.

Ирмос: Божиим светом Твоим Блаже, * утренюющих Ти души * любовию озари, молюся, * Тя ведети Слове Божий, * истиннаго Бога от мрака греховнаго взывающа.

Уступают ми херувими ныне, и пламенное оружие Владыко плещи мне дает, Тя видевшие Слове Божий, истиннаго Бога, разбойнику путь сотворшаго в рай.

Не кому боюся еже в землю Владыко Христе возвращения: Ты бо от земли возвел мя еси забвена, благоутробия ради многаго, к высоте нетления Воскресением Твоим.

Богородичен: Богородицу Тя от души, Владычице миру Благая, исповедающих спасай: Тя бо Предстательницу непобедимую имамы, истинную Богородительницу.

Ин. Вознесению

Ирмос: Утренююще вопием ти, Господи ...,

Исполнив веселия всяческая Милостиве, к горним силам с плотию пришел еси.

Ангельския силы вземлема Тбе видевшие, врата, взываху, Царю нашему возмите.

Апостоли видевши възвышаема Спаса, с трепетом взываху Царю нашему: слава Тебе.

Богородичен: Деву по рождестве поем Тя Богородице, Ты бо Бога Слова плотию миру родила еси.

Ин. святым отцем

Ирмос: Божиим светом ...,

Красны ноги яко воистинну, ныне проповедающих Тя Мир всяк ум преимущий, всех ангелов и человеков Христе, и множеством мира мир совокупающий. [Дважды.]

Премудрость, силу, Отчее Слово ипостасное Христе, Тебе сошедшее проповедаша, всесвятаго священства честно законом печатавшие, божественнии учителие. [Дважды.]

Слава: Вод струями чистыми учения, Православную Церковь напоившии, на водах покоя ныне наслаждаетесь вечно радующеся.

Богородичен: Свещник Пречистая светлый, всем озаряющий Христа Правды Солнце, Тебе ведуще едина Богородительнице Чистая, Твое ныне заступление призываем.

Катавасия: Решительное очищение грехов, * огнедуховенную примите Духа росу, * о чада светообразная церковная: * ныне от Сиона бо изыде закон, * языкоогнеобразная Духа благодать.

Песнь 6.

Ирмос: Житейское море воздвигаемое зря * напастей бурю, * к тихому пристанищу Твоему притек вопию Ти: * возведи от тли живот мой, Многомилостиве.

Распинаемь Владыко, гвоздьми убо клятву юже на нас очистил еси, копием же прободаемь в ребра, Адамово рукописание раздрав, мир свободил еси.

Адам низведен бысть, лестию запенся, ко адове пропасти: но естеством Бог же и Милостив, сошел еси ко исканию, и на раму понес, совоскресил еси.

Богородичен: Пречистая Владычице, рождающая человеком Кормчию Господа, страстей моих непостоянное и лютое разжени смущение, и тишину подаждь сердцу моему.

Ин. Вознесению

Ирмос: Обыде мя бездна:

Взыграшася апостоли, зряще на высоту днесь Зиждителя вземлема упованием Духа, и страхом зовяху: слава восходу Твоему.

Предсташа ангели, вопиюще Христе учеником Твоим: имже образом видесте Христа восходяща с плотию, паки придет Праведный всех Судия.

Яко видеша Тя Спасе наш небесныя силы, на высоту вземлема с телом, взываху, глаголюще: великое, Владыко, человеколюбие Твое.

Богородичен: Купину Тя неопалимую, и гору, и лествицу одушевленную, и дверь небесную достойно славим Марие славная, православных Похвало.

Ин. святым отцем

Ирмос: Житейское море ...,

Утаится не возможе плевелов сеятель, промысла неизреченного, неистовству тезоименит нареченный: Иуде бо поревновав, якоже он разсидеся вселукавый. [Дважды.]

Божественное собрание отец честное, Единородное Озарение, от существа возсиявшее Отча, проповедует Тя Владыко, и прежде всех век рожденна Сына.

Слава: Чрево растерзается по словеси, источник мутный и непитный ересей, источивший злочестивых, ралом молитвы священник божественных промысленнее.

И ныне: **Богородичен:** Великий преднаписа во пророцех Моисей, Тебе Ковчег, и Трапезу, и Свещник, и Ручку, образно знаменуя воплощение Вышняго из Тебе Мати Дево.

Катавасия: Очищение нам Христе * и спасение Владыко, * возсиял еси от Девы, * да яко пророка * от зверя морскаго персей Иону, * от тли исхитиши, всего Адама всеродна падшаго.

Кондак отцем, глас 8-й:

Подобен: Яко начатки:

Апостол проповедание, и отец догматы, Церкви едину веру запечатлеша, яже и ризу носящи истины, исткану от еже свыше богословия, исправляет и славит благочестия великое таинство.

Икос: Высоким проповеданием, Божию Церковь услышим вопиющую: жаждай да грядет ко мне и пиет чашу, юже держу, чаша есть премудрости, сие питие истины словом почерпх, воду проливающую не прекословия, но исповедания, юже пия нынешний Израиль, Бога зрит вещающа: видите, видите, яко Сам Аз есмь, и не пременяюся: Аз Бог первый, Аз же и по сих, и разве Мене несть иного отнюд. Отсюда причащающиися насытятся, и восхвалят благочестия великое таинство.

Синаксарий в неделю святых 318 богоносных отец, иже в Никей.

Стих: Светил собрание избранное: Лучевидны просветите мне мысли.

Стих: Странна Сына Отча Существа, глаголя: Арий сие, Божия славы странен.

В тойже день, в неделю седмую по Пасце, иже в Никей Первый Собор празднуем триста и осминадесяти богоносных отец, вины ради сиевые:

Понеже бо Господь наш Иисус Христос, в плоть оболкийся, еюже по нам смотрение все неизреченно действова, и ко Отческому паки взыде престолу, хотяще показати святии, яко воистинну Сын Божий бысть Человек, и совершенный Человек Вознесся Бог, и седе одесную величества на высоких, Собор сей святых отец тако Его проповеда, и исповеда Единосуцна, и Единочестна Отцу. Сим словом по славном Вознесении, настоящий уставиша праздник, аки собрание толиких отец предызводяще, Сего во плоти Вознесшася Бога истинна, и во плоти Человека совершенна проповедающе.

Собор же сей бысть при Константине Велицем царе, в двадесятом лете царства его, гонению преставшу. Сей в Риме прежде обладаше, потом же и всеславный Константинь град себе тезоименит создав.

В лето от создания мира пять тысяч осмьсот тридесять осмое, яже на ариа начаша глаголати. Иже Арий бяше убо от Ливии, во Александрию же пришед, и диакон от священномученика Петра Александрийскаго поставлен быв понеже хулити начат на Сына Божия, тварь Сего проповеда, от не сущих же быти, и далече суца от Божественнаго достояния злоупотребительно же Премудрости и Слову Божию глаголатися: яко уподобльшася Савеллию злочестивому, единолично, и единоипостасно глаголющу Божество. И овогда убо Отцу бывати, овогда же Сыну, овогда же Духу Святому.

Сия убо Ариа хуляща, великий Петр от священства его отлучает, Христа яко Младенца на святем жертвеннице виде, в раздранну облечена ризу и глаголюща, яко Арий раздра ю.

Ахилла же, по Петре патриархию примый Александрийскаго града, на обещаниих паки разрешает Ариа: к сим же поставляет его и пресвитера, и во Александрии учителя предпоставляет. Ахилле же скончавшуся, Александр бывает патриарх, иже Ариа таяжде и горшая хуляща обрет, от Церкви изринув, Собором того низложив, якоже глаголет Феодорит: яко и преложна естества Христа глаголаше, и безумную и бездушную восприяти плоть Господу, первый сей отрыгну. Арий убо многих своему злочестию подвед, пишет и усвояет Никомидийскаго Евсевия, Тирскаго Павлина, Евсевия же Кесарийскаго, и иных, и на александра вменяется. Александр же везде по вселенней хулы онаго и низложение послав, многих на лествь воздвиже.

Церкви убо смущаемей, и многим хотящим христианская примати, возбращаемым же любопрением учения, великий Константин везде по вселенней, людскими колесницами и носилы, сущыя отцы в Никею собрав, тамо и сам приходит. И отцем убо всем седшым, повелен и сам седе не на царстем престоле, но на умаленном достояния седалищи. И яже на Ариа глаголаным бывшим, анафеме убо он, и оному смудрствующи вси подлагаются. Слово же Божие от святых отец, Единосуцное, и Единочестное, и Собезначальное проповедается Отцу. Излагают же сии веры святыи Символ,

приведше той даже и до еже, И в Духа Святаго Господа: еже посем, Второй исполни Собор. Затверди же к сим Первый Собор и Пасхи праздник, когда, и како подобает нам той совершати, и не со иудей, якоже бяше переее обычно. Излагает же и правил о церковном исправлении двадесять. Святый же веры Символ, великий, и равноапостольный Константин послежде всех, червлеными затверди писмены.

Бяху же архиерей убо святых сих отец двесте тридесять и два. Священников же и диаконов, к сим же и монахов осмьдесять и шесть: всех же триста и осмьнадесять. Знаменитии же сии: Силвестр Римский архиерей. Митрофан Константины града, болен сый: сии убо быша ту чрез своя местоблюстителю. Александр Александрийский, со Афанасием Великим, архидиаконом тогда сущим, и Евстафий Антиохийский, и Макарий Иерусалимский. Оссий Кудрувский епископ. Пафнутий исповедник. Мироточивый Николай, и Спиридон Тримифунтский, иже тамо философа низложив крести, трисолнечное ему показав. Посреде же Собора двема к Богу преставльшемася отцема архиереома, великий Константин в ковчеги их предел святого собора вложив, и твердо заключив, обрете и от оных запечатан же и подписан неизреченными словесы Божиими.

Совершившуся же Собору, понеже и Царьград уже созидаемый совершися. Призывает Константин Великий святые оныя вся мужы, иже и обшедше весь град, и молировавшие и довольно, царствующий быти градовом уставляют, и Матери Слова того возложиша царю повелевшу. И тако святии кийждо отидоша в дома.

Но еще к Богу не отпешу великому Константину, с сыном своим Константином скиптры соблюдающе, Арий к царю приходит, глаголя: оставляю вся, и Церкви Божией соединитися хочу. Написав убо своя хулы обеси на выи, и аки бы Собору повинуюся, во оно рукою ударяя, сим глаголаше повиноватися: и убо царь во общение прияти Ария патриарху константины града повелевает. Бяше же тогда по Митрофане Александр, иже злонравие ведый мужа, не веруяй бяше, и молящеся Богу явити ему, аще по воли Его Арий приобщится. Егда же время прииде, в неже подобаше сослужити ему теплейший бывает в молитве. Арий же к церкви грядый, и негде близ столпа торговнаго, расторгнуся его чреву, в народное подтроние входит, и тамо расседеся, все внутреннее здание изрыгает долу, Иудино расседание подъем, о равнем предательстве Слова, и Божияго Сына Отца Существа оттерзая, растерзается сам, и мертв обретен быв: и тако Божия Церковь от онаго пагубы изменися.

Святых трех сот и осминадесати богоносных отец молитвами,

Христе Боже наш, помилуй нас. Аминь.

Песнь 7.

Ирмос: Росодательну убо печь содела ангел * преподобным отроком, * халдеи же опаляющее веление Божие, мучителя увеща вопити: * благословен еси Боже отец наших.

Рыдающее во Страсти Твоей солнце, во мрак облечется, и во дни по всей Владыко земли свет померче, вопия: благословен еси Боже отец наших.

Облекошася Христе, схождением Твоим во свет преисподняя, праотц же веселия исполнен явився, ликовствуя взыграше, вопия: благословен еси Боже отец наших.

Троицен: Царствующее и всеми владычащее Естество Триипостасное, благодати и безмерныя пучины Свет поюще, возопиим вернии: благословен еси Боже отец наших.

Ин. Вознесению

Ирмос: В печи огненной ...,

На облацех света Вознесыйся, и Спасый мир, благословен Бог отец наших.

На раму Христе, заблуждшее взем естество, Вознесся Богу и Отцу привел еси.

Возшедый в плоти к Безплотному Отцу, благословен Бог отец наших.

Умерщвленное наше грехом естество взем, Твоему Свойственному Отцу Спасе, привел еси.

Ин. святым отцем

Ирмос: Росодательну ...,

Победисте неистовству тезоименитаго Ариа, неистовствовавшего люте, и глаголавшаго на высоту неправедная. Божию бо Сыну отречется вопити: благословен еси Боже отец наших. [Дважды.]

Сына громава подражающе чуднии, Слова Отцу Собезначальна и Единопредстольна, огнезрачными усты вашими всех научисте вопити: благословен еси Боже отец наших. [Дважды.]

Слава: **Я**ко крилатии, Слову помогшии, приидосте богоблаженнии, от конец бо вселенныя собра вас Дух Святыи вопити: благословен еси Боже отец наших.

И ныне: Богородичен: **Ю**ношы три печь не опали, Рождество прообразующия Твое: Божественный бо Огнь Тебе не опалив, вселися в Тя, и всех просвети вопити: благословенна еси Бога плотию Порождающая.

Катавасия: Согласно возшуме органская песнь, * почитати златосотворенный бездушный истукан: * Утешителя же светоносная благодать почествует, * еже вопити: * Троице Единая, Равносильная, Безначальная, благословена еси.

Песнь 8.

Ирмос: Из пламене преподобным росу источил еси, * и праведнаго жертву водою попалил еси: * вся во твориши Христе, токмо еже хотети, * Тя превозносим во вся веки.

Иудейския древле пророкоубийцы люди, богоубийцы зависть ныне содела, Тебе на Крест Вознесшья, Слове Божий: Егоже превозносим во вся веки.

Небеснаго круга не оставил еси, и во ад сошед, всего совоздвигл еси Христе, лежащаго во гнои человека. Темже Тя поем во вся веки.

Богородичен: От Света Светодавца Слова зачала еси, и рождши несказанно Пресущественнаго: Дух бо в Тя Дево Божественный вселися. Темже Тя поем во вся веки.

Ин. Вознесению

Ирмос: Из Отца прежде век ...,

Во двою существу возлетевшаго Жизнодавца Христа на небеса со славою, и Отцу соседяща, священницы пойте, людие превозносите во вся веки.

От работы идольския тварь Избавившаго, и Представившаго ту свободну Своему Отцу, Тебе Спасе поем, и Тебе превозносим во вся веки.

Своим схождением Низложившаго супостата, и Своим возшествием Вознесшаго человеки, священницы пойте, людие превозносите во вся веки.

Богородичен: Херувимов превышшая явилася еси Богородице Чистая, во чреве Твоем сими Носимаго носившая: Егоже с безплотными человецы славословим во вся веки.

Ин. святым отцем

Ирмос: Из пламене преподобным ...,

Просветившися лучами Твоего Божества блазии Твои пастырие, Тебе исповедаша бытию Содетеля всех и Господа: Егоже превозносим во вся веки. [Дважды.]

Лик пастырей приснопамятный собрався, богомудренно Троицу Несозданную ныне богословя, всех учит вопити: Тя превозносим во вся веки. [Дважды.]

Благословим Отца, и Сына, и Святаго Духа, Господа.

Священноначальницы, пастырие достославнии, Христову Церковь просвещают, иный инуду сию освещающе, и превозносяще во вся веки.

Богородичен: Тайно во образех предвидеша Тебе пророцы вси, Слово рождшую, плоть бо из Тебе Вземый Сей пройде сугуб: Егоже превозносим во вся веки.

Таже, Хвалим, благословим, покланяемся Господеви, поюще, и превозносяще во вся веки.

Катавасия: Разрешает узы и орошает пламень * трисветлый богоначалия образ, * поют отроцы, * благословит же Единого Спаса и Вседетеля, * яко Благодетеля, * сотворенная всяческая тварь.

Поем, Честнейшую:

Песнь 9.

Ирмос: Бога человеком невозможно видети, * на Негоже не смеют чини ангельстии взирати: * Тобою бо Всечистая, явися человеком * Слово воплощено, * Егоже величающе, * с небесными вои, Тя ублажаем.

Страстем непричастен Ты пребыл еси Слове Божий, плотию приобщився Страстем: но решиши от страстей человека, страстем быв Страсть Спаса наш, един бо еси Безстрастен и Всесилен.

Тлю смертную прием, и тления соблюл еси тело Твое невкусно: Твоя же животворящая и Божественная Владыко душа, во аде не оставлена бысть, но якоже от сна воскрес, нас совоздвигл еси.

Троицен: Бога Отца, Сына Собезначальна, вси человецы устнами убо чистыми славим: неизреченную же и преславную Духа Всесвятаго силу почитаем: Едина бо есть Всесильная Троица Неразлучная.

Ин. Вознесению

Ирмос: Тя паче ума и словесе, Матерь Божию ...,

Тебе Избавителя мира Христа Бога, апостоли видяще Божественно возвышаема, со страхом играюще величаху.

Твою обожившуюся плоть зряще Христе, на высоте ангели, друг ко другу глаголаху: воистинну Сей есть Бог наш.

Тебе безплотных чинове Христе Боже, на облацех вземлема видяще зываху: славы Царю врата возмите.

Богородичен: Радуйся Богородице, Мати Христа Бога, Егоже родила еси, днесь от земли возносима, со апостолы зрящи возвеличала еси.

Ин. святым отцем

Ирмос: Бога человеком ...,

Обрет вы споборники собра, державною силою вооружив Духа, Отцу Собезначальное, и Сопрестольное Слово, прежде век Сущее: Егоже ныне всесвященнии, с небесными воинствы присно славите. [Дважды.]

Пажить Ариеву лютыя ереси, яко врачеве душам же и телесем устависте, священный веры Символ всем изложивше, иже ныне держаще, память вашу священнодействие присно славим. [Дважды.]

Слава: Яко Свет сый Христе Пречистый, от страстей мглы душу мою очисти, молитвами Владыко Твоих служителей, ныне Тебе проповедавших Безначальна, Несозданна, Зиждителя же всех и Бога, и Отцу Собезначальна.

И ныне: Богородичен: Мертвым воскресение ныне даровася Твоим неизреченным и неизглаголаным Рождеством, Богородице Владычице: Жизнь бо из Тебе плотию обложена всем возсия, и смерти неуслабное яве разруши.

Катавасия: Радуйся, Царице, * матеродевственная славо, * всяка бо удобообращательная * благоглаголивая уста витийствовати не могут, * Тебе пети достойно, * изумевает же ум всяк Твое Рождество разумети. * Темже Тя согласно славим.

Свят Господь Бог наш. [Трижды.]

Ексапостиларий воскресен:

Тивериадское море с детьми Зеведеовыми, Нафанаила с Петром же, и с другима двема древле, и Фому имяше на лове, иже Христовым повелением одесную ввергше, множество извлекоша рыб: Егоже Петр познав, к Нему бродяше, имже третье явлейся, и хлеб показа, и рыбу на углех.

Слава: отцев. Подобен: Жены услышите:

Отец божественных днесь память празднующе, моленьми тех молим Всещедре: всякого вреда ересей избави люди Твоя Господи, и вся сподоби, Отца Слова славити, и Всесвятаго Духа.

И ныне: Вознесения:

Учеником зрящим Тя, Вознеслся еси Христе ко Отцу соседя, ангели предтекуще зовяху: возмите врата, возмите, Царь бо взыде к начальному Свету славы.

На хвалитех, Всякое дыхание: поставим стихов 8. И поем стихиры воскресны, 4: И святым отцем, 4.

Стихиры воскресны, глас 6-й:

Крест Твой Господи, жизнь и воскресение людям Твоим есть, и надеющиеся на нь, Тебе воскресшаго Бога нашего поем: помилуй нас.

Погребение Твое Владыко, рай отверзе роду человеческому, и от тли избавльшеся, Тебе воскресшаго Бога нашего поем: помилуй нас.

Со Отцем и Духом Христа воспоим воскресшаго из мертвых, и к Нему возопиим: Ты еси Жизнь наша и Воскресение, помилуй нас.

Тридневен воскрес еси Христе из гроба, якоже есть писано, совоздвигнувший праотца нашего: темже Тя и славит род человеческий, и поет Твое воскресие.

Ины стихиры святых отец, глас 6-й:

Подобен: Всю отложивше:

Все собравше душевное художество, и Божественным Духом сразсмотривше, небесный и честный Символ веры, честнии отцы богописание начерташа: в немже явственнейше Рождшему Собезначального Слова научают, и всеистинно Единосущного, апостольским последующе проявленно учением, благославнии и пребогатии истинно, и богомудрии.

Все приемше умное сияние Святаго Духа, преестественнейшее благословие, краткими глаголы, и многим разумом богодухновенно провещающа: яко Христовы проповедницы, евангельских предстателие учений блаженнии, и благочестивых преданий, свыше приемше сих откровение яве, и просвещшеся, изложивша веру Богонаученную.

Стих: Благословен еси Господи Боже отец наших: и хвально и прославлено имя Твое во веки.

Все собравше пастырское искусство, и ярость подвижше ныне праведнейшую, отмстительне тяжкия отгнаша и пагубныя волки, пращею Духа извергше от церковного исполнения, падшья яко к смерти, и яко неисцельно недуговавшья божественнии пастырие, и яко раби истиннейшии Христовы, и Божественного проповедания таинницы священнейшии.

Стих: Соберите Ему преподобныя Его, завещающыя завет Его о жертвах.

Все собравше душевное художество, и Божественным Духом сразсмотривше, небесный и честный Символ веры, честнии отцы богописание начерташа: в немже явственнейше Рождшему Собезначального Слова научают, и всеистинно Единосущного, апостольским последующе проявленно учением, благославнии и пребогатии истинно, и богомудрии.

Слава: глас 8-й:

Святых отцев лик, от конец вселенныя стекшийся, Отца и Сына и Духа Святаго, Едино Существо научиша и Естество, и тайну богословия ясно предаша Церкви: ихже похваляюще верою ублажим, глаголюще: О божественный полче, богоглаголивии оружицы ополчения Господня, звезды многосветлая мысленныя тверди, таинственного Сиона неборимии столпи, миродохновеннии цветы райстии, всезлатая уста Слова, Никейская похвало, вселенныя украшение, прилежно молитесь о душах наших.

И ныне: Препоблагословенна еси Богородице Дево:

Славословие великое. Тропарь воскресен точию. Ектении и отпуст.

И исхождение в притвор стихира евангельская, глас 6-й:

Слава, и ныне: **По** еже во ад сошествии, и еже из мертвых воскресении, скорбяще якоже достояще, о разлучении Твоем Христе, ученицы на делание обратишася, и паки корабля и мрежи, и лова нигдеже. Но Ты Спасе, явився яко Владыка всех, одесную мрежи повелеваеши вовежди, и бысть слово дело вскоре. И множество рыб многое, и вечера странная готова на земли: еяже причастившимся тогда Твоим учеником, и нас ныне мысленно сподоби насладиться, Человеколюбче Господи.

И час первый. На 1-м часе тропарь воскресен. Слава: праздника: И ныне: Богородичен часов. По трисвятом кондак праздника. На 3-м часе тропарь воскресен. Слава: отцев. И ныне: Богородичен часов. По трисвятом кондак отцев. Таже и на прочих часах, тропарь и кондак праздника, и отцев, глаголем прменяюще.

НА ЛИТУРГИИ

Блаженна гласа на 4, и праздника песнь 4-я, на 4 и отцев песнь 6-я, на 4.

Помяни мя Боже Спасе мой, егда приидеши во Царствии Твоем: и спаси мя, яко един Человеколюбец.

Древом Адама прельстившагося, Древом Крестным паки спасл еси, и разбойника вопиюща: помяни мя Господи во Царствии Твоем.

Адова врата и верей сокрушивый Жизнодавче, воскресил еси вся Спасе, вопиющыя: слава Восстанию Твоему.

Помяни мя, Иже смерть Пленивый погребением Твоим, и Воскресением Твоим радости вся исполнивый, яко Благоутробен.

Вознеслся еси во славе, ангелов Царю, Утешителя нам от Отца послав. Темже вопием: слава Христе Вознесению Твоему. [Дважды.]

Яко взыде Спас ко Отцу с плотию, удивившася ангельская воинства, и возопиша: слава Христе Вознесению Твоему.

Ангельския силы горнейшим вопияху: врата возмите, Христу нашему Царю, Егоже воспеваем вкупе со Отцем и Духом.

Утаитися не возможе плевелов сеятель, промысла неизреченного, неистовству тезоименит нареченный: Иуде бо поревновав, якоже он разсееся вселукавый.

Божественное собрание отец честное, Единородное Озарение, от существа возсиявшее Отча, проповедует Тя Владыко, и прежде всех век рожденна Сына.

Слава: Чрево растерзается по словеси, источник мутный и непитный ересей, источивший злочестивых, ралом молитвы священник божественных промысленнее.

И ныне: Богородичен: Великий преднаписа во пророцех Моисей, Тебе Ковчег, и Трапезу, и Свещник, и Ручку, образно знаменуя воплощение Вышняго из Тебе Мати Дево.

По входе глаголем тропарь воскресн, глас 6-й:

Ангельския силы на гробе Твоем, и стрегущии омертвеша: и стояше Мариа во гробе, ищущи Пречистаго Тела Твоего. Пленил еси ад, не искусився от него: сретил еси Деву, даруяй живот, воскресый из мертвых, Господи слава тебе.

Тропарь Вознесения глас 4-й:

Вознеслся еси во славе Христе Боже наш, радость сотворивый учеником, обетованием Святаго Духа, извещенным им бывшим благословением: яко Ты еси Сын Божий Избавитель мира.

Тропарь отцев, глас 8-й:

Препрославлен еси Христе Боже наш, светила на земли отцы наши основавый, и теми ко истинней вере вся ны наставивый: Многоблагоутробне, слава Тебе.

Кондак отцем, глас 8-й:

Слава: **А**постол проповедание, и отец догматы, Церкви едину веру запечатлеша, яже и ризу носящи истины, исткану от еже свыше богословия, исправляет и славит благочестия великое таинство.

Кондак Вознесению, глас 6-й:

И ныне: **Е**же о нас исполнив смотрение, и яже на земли соединив Небесным, Вознесся еси во славе Христе Боже наш, никакоже отлучаяся, но пребывая неотступный, и вопия любящим Тя: Аз есмь с вами, и никтоже на вы.

Вместо прокимна песнь отцев, глас 4-й: **Благословен еси Господи Боже отец наших: * и хвально и прославлено имя Твое во веки.**

Стих: **Яко праведен еси о всех, яже сотворил еси нам:**

Апостол в деяниях, зачало 44:

Во дни оны, суди Павел мимо ити Ефес, яко да не будет ему закоснети во Асии, тцаше бо ся, аще возможно будет, в день Пятидесятный быти во Иерусалиме. От Милита же послав во Ефес, призва пресвитеры церковныя. И якоже приидоша к нему, рече к ним: внимайте убо себе и всему стаду, в немже вас Дух Святый постави епископы, пасти Церковь Господа и Бога, юже стяжа Кровию Своею. Аз бо вем сие, яко по отшествии моем внидут волцы тяжцы в вас, не щадящии стада. И от вас самех востанут мужие глаголющии развращеная, еже отторгати ученики вслед себе. Сего ради бдите, поминающе, яко три лета нощь и день не престаях уча со слезами единого кождо вас. И ныне предаю вас, братие, Богови и слову благодати Его, могущему наздати и дати вам наследие во освященных всех. Сребра или злата или риз ни единого возжелах. Сами весте, яко требованию моему и сущим со мною послужите руце мои сии. Вся сказах вам, яко тако труждающимся подобает заступати немощныя, поминати же слово Господа Иисуса, яко Сам рече: блаженнее есть паче даяти, нежели приемати. И сия рек, преклонь колена своя, со всеми ими помолися.

Аллилуиа, глас 1-й: **Бог богов Господь глагола, и призва землю от восток солнца до запад.**

Стих: **Соберите Ему преподобныя Его, завещающыя завет Его о жертвах.**

Евангелие от Иоанна, зачало 56:

Во время оно, возведе Иисус очи Свои на небо и рече: Отче, прииде час, прослави Сына Твоего, да и Сын Твой прославит Тя. Якоже дал еси Ему власть всякия плоти, да всяко, еже дал еси Ему, даст им живот вечный, се же есть живот вечный, да знают Тебе единого истинного Бога, и Егоже послал еси Иисус Христа. Аз прославих Тя на земли, дело соверших, еже дал еси Мне да сотворю. И ныне прослави Мя Ты, Отче, у Тебе Самого славою, юже имех у Тебе прежде мир не бысть. Явих имя Твое человеком, ихже дал еси Мне от мира. Твои беша, и Мне их дал еси, и слово Твое сохраниша. Ныне разумеша, яко вся, елика дал еси Мне, от Тебе суть. Яко глаголы, ихже дал еси Мне, дах им, и тии прияша, и разумеша воистинну, яко от Тебе изыдох, и вероваша, яко Ты Мя посла. Аз о сих молю, не о всем мире молю, но о тех, ихже дал еси Мне, яко Твои суть. И Моя вся Твоя суть, и Твоя Моя, и прославихся в них. И ктому несмь в мире, и сии в мире суть, и Аз к Тебе гряду. Отче Святыи, соблюди их во имя Твое, ихже дал еси Мне, да будут едино, якоже и Мы. Егда бех с ними в мире, Аз соблюдах их во имя Твое, ихже дал еси Мне, сохраних, и никтоже от них погибе, токмо сын погибельный, да сбудется Писание. Ныне же к Тебе гряду, и сия глаголю в мире, да имут радость Мою исполнену в себе.

За Достойно, поем и до отдания ирмос:

Величай душе моя, **Вознеси**ся от земли на небо, **Христа Жизнодавца.**

Ирмос: Тя паче ума и словесе **Матерь Божию**, в лето **Безлетного** неизреченно рождшую **вернии** единомудренно **величаем.**

Причастный: Хвалите Господа с небес:

Другий: Радуйтесь: Аллилуиа, трижды.